

30. Ille, *INDRÆ* socius futurus, cum per hunc stirpis propagatorem stirpem stabilisset, cupidine a rebus sensualibus retracta, ablutiones peragens in tribus fluminibus sacris, divinitatem adeptus est.

31. Ejus uxor *Paushæ* mensis plenilunii die peperit *PUSHYAM*, topazium splendore superantem, sub quo, quasi altero *Pushyæ* sidere orto, homines eximia gaudebant prosperitate.

32. Magnanimus ille postquam terræ regnum filio suo detulisset, atque semetipsum *JAIMINI* sapienti tradidisset, ab illo devoto devotionem adeptus, vitam mundanam reformidans, liberationis ab ea particeps factus est.

33. Post hunc filius ejus *DHRUVASANDHIS*, stellæ polari comparandus, regnum accepit sub quo optimo, fidem servante, pax firma erat cum hostibus, morem gerentibus.

34. Ille, hinnulei oculis præditus, virorum leo, cum filius ejus *SUDAR-SANAS*, qui lunæ instar orbe novato oculos delectabat, puer adhuc esset, in venatione circumvagans, a leone necatus est.

35. Cum ille in cælum ascendisset, ministri, civium caussa domini jactura afflictorum, unicum illius stirpis propagatorem uno consensu rite *Ayodhyæ* regem fecerunt.

36. *RAGHUIS* stirps, hoc rege nondum adulto, comparanda erat cum cœlo, in quo luna modo orta splendet, sive cum sylva, a leonis pullo inhabitata, sive cum lacu, lotum nondum expansam ferente.

37. Cum diademate ornatus esset, homines prævidebant, illum patri similem futurum: jam antea enim nubes visa est, quæ, etsi non nisi elephanti pulli magnitudinem habebat, Euro acta plagas cœlestes involvit.

38. Cum elephanto vectus in via regia incederet, ab elephanti rectore sustentatus, eximiis vestibus indutus, cives eum, vix sex annos natum, ob dignitatem regiam eadem qua patrem adspexerunt veneratione.

39. Quamquam ille solium patrium explere non valebat, tamen totum illud occupavit, quia corpus ejus ingenti splendore, auri instar fulvo, quasi extensum erat.